

四庫全書

集部

欽定四庫全書

集部

莊簡集卷十

八至

詳校官庶吉士臣翁樹培

侍讀臣孫球覆勘

謄錄監生臣張曾壻

謄錄監生臣范維城

欽定四庫全書

莊簡集卷八

宋 李光 撰

奏議

乞開言路劄子

臣聞帝王之美莫大於詢謀治安之時尤先於警戒歷觀前代有為之君雖聰明有餘而切直之言不絕於耳雖天下大治而幾微之慎不忘於懷恭惟皇帝陛下以睿知寬仁之資膺祖宗積累隆平之業勞心求治幾三

十年華夏乂安天地交泰符瑞之應史不絕書所謂太平盈成之期實在今日陛下所當憂勤宵旰虛己以聽納羣臣所宜精白勉勵夙夜以進戒而近歲以來士大夫狃於因循宴安寵祿謗佞成風至妄引苟卿有聽從無諫爭之說以杜塞言路多士盈庭莫敢開說是陛下有容納之德而羣臣進拒絕之計朝政之闕失臣下之姦邪生民之利病海內之休戚何由盡聞乎古人有言曰堂上遠於百里堂下遠於千里門庭遠於萬里蓋言

壅隔之禍深也臣愚伏望陛下博延羣臣明詔天下廣
衆正之路開不諱之門使忠良謇諤之士有所規益而
讜言進傾邪讒巧之徒不得壅蔽而下情通實天下幸
甚取進止

論百姓失業劄子

臣聞堯舜在上天下無窮人文王之民無凍餒者蓋國
以民為本而民以食為天自古賢聖之君莫不貴農重
穀以裕天下一夫不耕或受之饑一女不織或受之寒

饑寒並至而能不為姦邪者鮮矣仰惟陛下臨御海窩
躬修節儉以安百姓涵養生息如天地之無不覆載雨
露之無不潤澤每發德音下明詔未嘗不以寬恤為先
懷生之屬罔不欣戴可謂治極乎堯舜而恩深於文王
好生之德浹肌膚淪骨髓矣邇者朝廷稍務損益時政
以適厥中而奉承之吏用意過當不復推廣陛下仁民
愛物之心貪殘苛暴公肆掊斂百姓嗷嗷失業者衆監
司守宰坐視流亡恬不加恤強者結集為寇盜弱者轉

徒乎溝壑是致輦轂之下旬者日滋號呼呻吟枕藉道
路此陛下耳目所及至近而易察者然且壅隔而不盡
聞况四方萬里之外乎深恐怨嗟之聲干戾陰陽聚為
祲厲傷害和氣臣愚伏望陛下流寬大之澤抑煩苛之
吏申勅諸路提舉常平官或間遣信使以巡撫四方延
問民所疾苦蠲逋負省徭役以仰副陛下愛育元元之
意實天下幸甚取進止

辭免除右司諫狀

臣准東上閣門告報已降告命除臣右司諫臣聞命震
驚罔知所措伏念臣資性樸愚學術荒落方陛下初登
寶位開廣言路寢直盡下之時宜得方正忠謇之士置
在左右拾遺補闕庶有裨益如臣庸妄風節無聞倘或
冒居實累初政伏望陛下察臣誠悃非敢矯飾追寢成
命別除臣一職合入差遣庶安愚分所有告命未敢祇
受謹具狀奏聞伏候勅旨

論梁師成劄子

臣伏覩敵騎內侵需索犒軍金銀陛下以宗社生靈為
重屈意求和上自乘輿服御宗廟器皿下至民間首飾
之物拘收殆盡大臣戚里之家不免直取獨未聞宦官
能體陛下憂勞之意者近年以來宦官用事或殖貨利
或治宮室或開拓邊境或進退臣僚皆能竊弄威權以
厚自封殖此陛下耳目所及不復縷陳其專權擅勢桀
黠尤甚者莫如梁師成師成用事日久能作威福計其
家費無與為比當此危急之時獨不在直取之數臣竊

惑之臣謹按師成出入禁掖踰二十年罪惡貫盈不可悉數方蔡京王黼相繼用事朝綱隳壞賄賂公行姦邪朋附而為之用忠賢擯斥而不得進師成與之締交闕通表裏蒙蔽引用浮薄布滿中外依憑城社玷辱聖朝以至海內怨嗟養成今日之患迹其罪惡久合誅鋤方陛下踐阼之初聖政日新一時憲人咸知退縮而師成儼然居中執政大臣慮其狡猾多計恐一旦復得進用莫敢動搖伏望陛下斷自淵衷以師成付有司籍其家

貲窮究姦慝以正典刑因以風厲黨類庶有懲革實天下幸甚取進止

言蔡京章疏不繫階分析狀

臣準尚書劄子二月二十二日奉聖旨言蔡京章疏柳約李某不曾繫階令分析聞奏者臣聞命震驚罔知所措臣昨於今年正月二十四日供職至二月初三日入局忽報臺諫官上殿臣方驚疑詢問同列據司諫李會正言師驥云初二日晚有急速公事乞對緣臣是日早

出不暇相率既未得班次至初三日只將侍御史孫觀
論列蔡京文字列銜同上即不曾聚議及報臣知委臣
是時供職未及旬日正當朝廷多事之際敵騎未退臣
嘗按梁師成罪惡首以蔡京王黼締交闕通表裏蒙蔽
為說然臣後來不曾再有彈奏臣實失職雖天度包荒
未即罷斥在臣愚分誠不自安臣見居家待罪伏望聖
慈解臣言職以厭公議

論內臣梁永劄子

臣訪聞高品梁永等昨因宣和七年十二月差充伴送
金國回謝番編欄官沿路作過挫辱守令毆擊頓司恣
橫不法及取受過錢物每名不下一千五六百貫送大
理寺根勘各條贓罪流在案該大赦原罪準律諸以贓
入罪正物見在者還官其已費用者死及配流勿追餘
皆追之今永等所配雖已該赦有追到贓物見在大理
寺贓罰庫永既釋放却計會內侍省差權大理寺監門
節次將劄子求囑本寺少卿請出元追到贓物臣契勘

永既因罪追攝下寺根勘於本寺官已有妨嫌况贓物在庫未經戶部拘收遂敢一面請領顯屬違法欲望聖慈令戶部日下將上項已追到贓物重別估定價例除已納足所犯贓外其餘恐合給還仍乞罷本人見權監門庶免姦弊取進止

乞罷李彥辟官劄子

臣近奉聖旨專委臣看詳京東西兩路係李彥辟置西城所害民之官並令放罷臣今契勘兩路州縣官係御

筆內降聖旨除授之人其為員數尚多吏部不肯着
實供具若盡行放罷其間却致枉濫臣今欲將監司知
通元係聖旨司錄已下元係吏部注授別無害民顯迹
並且存留外其餘並乞放罷取進止

論鄧雍劄子

臣伏覩近降指揮今之尚書侍郎異日宰執之選也都
省所接詞訴分送六曹與決施行陛下責任之意可謂
重且專矣則居是職者非得天下英偉豪傑之士智識

才器足以當異時輔弼之選者曷宜任此哉臣謹按吏部侍郎鄧雍不學無術世濟奸邪其父洵武任樞密使因緣請託特許赴殿試闈通近倅猥中科目濫廁從列帷薄荒穢士大夫目為豔班兼雍不曉吏事又欲廢法任情專受請託選人闕陞改官意所欲與雖郎官執條例以進輒遭詬譽人材猥下趣操頗僻不足汚天官之選伏望聖慈特賜罷黜施行庶厭公議取進止

論鄧雍第二劄子

臣伏見近年以來嬖倖用事奸邪擅權賢否混淆是非顛倒世家之子布滿要塗瀆亂朝綱莫斯為甚臣謹按前吏部侍郎鄧雍專以便僻側媚蹣取要官初無學術而使之特赴殿試不知古今而使之猥廁經筵帷薄不脩踪迹醜穢士林傳播以為笑談今雖罷遣尚仍舊職玷高華之選實於公議有所未允伏望特出睿斷早賜褫奪職名投置閒散庶幾聖朝名器不以假人且絕奸邪覲覦之路實天下幸甚取進止

乞追究王蕃召姚古劄子

臣等伏見朝廷自聞金人入境即差王蕃姚古充京畿四面制置使今姚古未聞來期王蕃統領禁兵避敵遠遁不知所在京畿諸邑及近京州縣例被劫掠道路不通都城閉闢多日民間百物窘乏人情憂懼欲乞先次選差將兵分屯城外以禦他寇仍開南城一面門多差將兵譏察守禦以通往來仍乞差官趣召姚古追究王蕃所在取進止

論吳鏗劄子

臣聞重刑再覆國之常典唐太宗每決一囚必三令五
覆蓋所以重人命也訪聞元豐庫受納金銀一項百姓
王宜納金五十兩貼司李元亨上歷誤作五兩當日有
提領官吳鏗到庫點檢係胥長劉鐸即時以元數執覆
取鈔呈驗發覺訖元金見在李元亨畏罪逃竄吳鏗不
曾送所司根勘一面申奏取旨便將監官降官劉鐸貸
命杖脊刺配沙門島雖已蒙改正其吳鏗并無行遣臣

謹按鎧本市井小人狡猾反覆自來謗事權倖不二年致身從橐今來為見大臣収簇金銀急於傳會遂致廢法任情欺罔聰衆論藉藉咸謂枉濫實累陛下始初清明之政伏望聖慈矜憐無辜將鎧重行竄斥非獨為小人之戒亦以仰副陛下欽恤之意取進止

論曾紓等劄子

臣惟國家之興聖聖相授專務愛育元元以固邦本而四海之廣所與共治以惠養斯民者尤在於守令監司

之職委以刺舉實外臺耳目之寄專以按察州縣者也
其任顧不重哉伏自陛下即位以來號召天下豪傑之
士聚之朝廷而貪汙不法之吏多在外服或倚勢作威
或倚法虐下誅求掊斂靡有藝極使遠方之民無所申
訴朝廷何賴焉臣伏見江西轉運曾紓福建轉運趙岸
唐績提舉市舶張佑提舉廣東香鹽黃昌衡府界提舉
常平陸棠皆緣交結權倖以躡取名位邪佞凶狡素無
廉聲皆不足以當一道之寄岸績遠任福建漕臣朝廷

近差陳磷等為代遂通賄賂於梁師成以造茶為名不肯離任佑本泉州大商今市舶解治乃在泉州背公營私何往不可近聞營造第宅盡令屬邑科買材木賦汙不法一方之民咸受其弊昌衡棠皆奴事朱勔昌衡頃知秀州華亭縣抑勒人戶依等第科買白鶴每隻至有百餘千者自秀至蘇花石珍禽絡繹不絕遂就除本州通判益肆掊取東南之民莫不憤怨棠知平江府長洲縣專一勾當宋勔家事民間訟牒悉委佐官平江地瀕

太湖勑田產盡在長洲縣多被水患民間不肯承佃棠
既為抑勒上戶佃種稍不承認即枷項送獄既承之後
永無脫期至破家蕩產賣妻鬻子猶監錮不已良民妻
女稍有姿色者必多方鈎致百姓田園號為膏腴者必
竭力攘取以搜尋奇玩而發人籠篋者有之以訪求古
物而掘人家墓者有之紓故相布之子因謫事宜官進
職賜帶頃任楚州及鎮江府通判皆以本州娼女自隨
替罷挈之而去惟薄荒穢父子聚塵尤為清議之所不

容伏望聖慈特降睿旨盡行竄斥以正刑書仍乞精擇廉幹修潔素有風力之人以充監司之選庶幾朝廷惠澤得以下究細民疾苦得以上聞仰副陛下勤恤民隱之意天下幸甚取進止

乞奉迎上皇劄子

臣聞唐明皇避寇幸蜀肅宗即位靈武及二京平李泌為羣臣通奏具言天子思戀晨昏請促還以就孝養若泌者可謂善處人父子之間矣恭惟陛下天性仁孝伏

自上皇東幸暴露日夜憂思至避殿減膳不遑寧處羣臣士庶莫不知之而軍興之際朝廷多事道路隔絕臣恐陛下至意未能感通而姦邪之人易成間隙以上貽宗廟之憂下為羣臣之禍治亂之原安危之機盡在於是臣愚伏望陛下親降詔旨令三省樞密院集兩省臺諫官合議奉迎上皇典禮使陛下大孝之美純粹光顯過於未登大位之時實天下幸甚取進止

論內臣鄧珙等狀

臣恭惟道君太上皇帝倉卒南征暴露野次陛下憂懼不知所為金人退師之翌日遣使問安又擇見任執政為奉迎使陛下東嚮臨遣於庭令所至賞犒隨行將士撫諭行宮使已下令扈從以必上皇之歸孝思至矣且命宗室父老迎謁近甸亦既越旬未聞屬車之音羣臣士庶不能無私憂者以羣小人在側臣訪問隨行內侍其間頗有讒邪之人造飾奸言欲以離間陛下父子以龍德為隘而進西幸之策使陛下以天下之大而

不能安其親挾此為奸何所不至此誠社稷之深憂也
臣願陛下擇其尤甚者行遣一二其往來京城踪跡詭
秘如鄧珙者傳播詔書以惑衆聽如劉輿者妄議朝政不
循分守如徐霽者朋附道流凶惡稔著如董舜賢者李
琮梁師彥之陰懷反側任鈞馮彥石如岡之素著凶豪
凡此數人皆工讒善佞小人之桀黠者也自知過失既
多畏陛下之嚴恐一旦有所不容是以日夜鬪覬構間
百端不可不慮臣愚伏望陛下遣使躬稟上皇將此數

人重行竄斥別選老成端愿之人以充上皇掃除之後庶幾小人不敢牽制行宮既復二聖重歡實天下慶幸

論宋喚劄子

臣等伏見新除發運副使宋喚檢僕庸狡專事反覆姦
締交於王黼復聯姻於蔡攸叨竊寵榮積有過惡朝廷
近者再除喚發運使臣等謂陛下濶畧往愆責以後效
未敢論列今乃聞喚包藏禍心覆出為惡撰造不根之
語脅持上下欲以離間陛下父子之愛物論徇徇莫不

疑駭伏望陛下斷自淵衷早賜竄逐以厭公論取進止

三月三十日奉聖旨宋
煥落職與在外宮祠

論明節皇后不當立忌狀

臣准西上閣門關準太常寺關今年迎奉道君太上皇帝若在四月二日到京緣當日係明節皇后忌辰合分定奉迎及行香官者臣嘗考求典禮明節皇后不當立忌昨緣太常少卿林震率意迎合妄援溫成故事為明節皇后立忌因以為例不復討論遂使聖朝著非禮之

舉貽譏後世不可不革竊詳忌日之制罷樂廢務修齋
行香皆子孫致其追慕之誠五季之亂可謂無禮法矣
周世宗宣懿皇后入廟議者猶以太后在上疑祔廟之
後立忌非便嘉祐中言者以久雨陰沴宗廟之禮恐有
未順且謂城南立溫成廟四時祭享並同太廟之禮蓋
當時有司失於講求商宗遭變飭已思咎祖已訓以典
祀無豐於昵况以嬖寵列於秩祀非所以享天心奉宗
廟之意也熙寧中有司議改溫成廟為祠殿歲時遣官

臣行事忌日齋祭並合廢罷識者是之今陛下初嗣歷
服宜大正始之時宗廟國之大事伏望聖慈下有司討
論典禮務合中制所有明節忌辰乞且依溫成故事罷
百官奉慰行香止令內臣就祠殿行事薦以常饌庶合
典禮謹錄奉聞伏候勅旨

論制國用劄子

臣伏覩祖宗之制天下財穀悉總於三司非條例有定
數不敢擅支朝廷知其大數量入為出故能倉廩充溢

用度有餘近年以來政出多門法度寢弛戶部既不得
總天下財賦朝廷亦無緣盡知錢穀大數侵支互用不
可幾察名為應奉御前其實般入私室東南財賦盡於
朱勔西北財賦困於李彥天下根本之財竭於蔡京王
黼自徐鑄蔣彞為常平司官何漸為茶馬司官張琬徐
愬燕瑛為市舶官應安道朱彥美王子獻王復為轉運
司官胡直孺盧宗原為發運使王仲閔胡邃為提點刑
獄宋誨為香鹽官劉寄呂呸毛孝立為鹽司屬官天下

財賦盡歸權倖之家小人乘時無復忌憚今所至匱竭
公家無半年之儲百姓無旬日之積加之兵興府庫金
帛散用將盡此乃國用危急之時所謂理財經久之術
不可不慮伏望遵依祖宗故事使三省樞密院通知兵
民財利大計與戶部量一歲出入以制國用仍乞精擇
健吏通知財計者置司驅磨諸路應干錢物往來移用
遇及見在之數其官吏各量添俸給課以功限為之賞
罰或專遣使命就所至勾集諸司人吏驅磨庶幾利源

歸一而天下財用可得而理矣取進止

論三鎮親王劄子

臣聞春秋之義許外國者不一而足顏師古曰節制之不皆稱其所求也臣伏覩金人恃衆凌犯邊求無藝陛下天度包荒不愛重寶不惜土地又遣親王大臣為質卑辭厚禮惟恐少失其意待之可謂盡矣而貪婪無厭詭詐難測近者載遣使人復以親王大臣都尉為請無禮亦甚矣臣職在諫垣連日伺候班次未蒙引對退伏

維念上皇在東南陛下闢晨昏之養未有以慰其意今
連遣二子入不測之敵無乃傷父子之情乎況肅王辱
弱置之軍中萬一暴露感疾陛下有殺弟之名又三鎮
者皆天下勁兵處太祖太宗百戰乃得之一旦舉以予
人陛下為人子孫嗣守大業使兩路生靈無故陷沒尚
何以為國乎此又不可之大者夫城下之盟諸侯之所
深耻以國家全盛之勢四海九州之廣勤王之師不絕
於道伏望陛下明詔將相大臣別議攻守之策仍乞間

道遣使檄河東河北兩路盡發強壯策應首尾掩擊天
地助順必成大功臣無任忠憤激切之至

論土豪乞依戰功補授劄子

臣伏見河北河東路宣撫副使李彌大申乞初等不理
選限官誥一百道欲以召募土豪此必彌大窺見朝廷
不肯假借且懼招權之嫌故其所乞不敢過當又能為
陛下吝惜名器志雖可嘉臣竊聽外議以為方今多事
之際正藉捐軀死難之士使真有土豪能糾率勇士捍

禦邊方恐非虛名所能招致指揮一下聞者竊笑伏自
陛下即位以來罷花石之冗費斥應奉之邪僉濫恩僭
賞所省已不貲矣奪彼與此孰得孰失况今太原危急
邊境繹驛此正拔士卒為將帥之時所有應緣召募首
領合與官人並乞作戰功補授庶幾人人樂從應募必
衆取進止

辭免除侍御史劄子

臣聞命震驚莫知所措伏念臣承學淺陋賦性迂愚比

者伏蒙陛下擢寘諫垣日月未幾曾無古人正色獻替之効莫副陛下虛懷聽納之勤覲顏尸祿日俟罪譴敢圖誤獎更踐臺端况今多事之際士論未一民論未孚非智識議論足以裨益政體剛方諒直足以糾正官邪曷可仰副陛下責任之意如臣妄庸猥被簡拔恩私過厚職任難勝退自省循安敢冒處伏望陛下察臣誠悃追寢成命別除一閒慢差遣庶安愚分臣無任激切屏營之至謹具狀奏聞伏候勅旨

再辭免侍御史劄子

臣近蒙恩除侍御史尋具狀辭免聖恩深厚未賜矜從非
臣捐軀所能報稱而義有未安不能但已須至頻瀆淵
聽伏念臣出自寒鄉蹤跡孤遠歷官州縣踰二十年風
節無聞志氣凋落茲者伏遇陛下龍飛首擢諫列詢事
考言曾無消埃可以上裨聖政之萬一方懷憂畏日俟
譴呵豈敢躡處要路以冒不次之寵况陛下初嗣大政
當擾攘之時避殿減膳躬自貶損憂勞備至而德意未

孚於國人播告雖修而實利未及於天下羣賢誼閥權
柄下移遂使人主之威福朝廷之紀綱幾無以自立復
以畏避相先莫敢任責而臣人徵望輕乃於斯時身任
言責橫當風波實恐無以稱塞上辜陛下委寄之意伏
望聖慈察臣情辭非出矯偽別移一閒慢去處庶可勉
策駕短隨事補報臣不勝哀祈激切之至取進止

論體究姚古等劄子

臣準朝旨差往河東路體究姚古已下統制官不進兵

等事係干重密合先次取會因依次第看詳體究詣實
竊慮古等却作因糧道不繼別以私說回報雖未明
虛實理合體究的實恐臨時有妨施行其前項事若干
涉監司州縣等處即未審合與不合一就體究伏望聖
旨詳酌施行如蒙許一就體究即乞特降處分付臣照
會所有應干今來體究公事合關報臣事節並乞依已
降指揮不得下司所貴慎密不致漏露取進止

五月一日三省

樞密院同奉聖旨河東諸統制官內有逗遛不進者其姪
古不能節制以軍法從事致久未成功姚古可落檢校

官罷節鉞與承宣使依舊河東制置使其統制官差侍御史李某前去體究逗遛尤甚者械送赴闕取旨李某令東上閣門今月二日引見上殿訖疾速起發仍不下午司有劄付李侍御靖康元年五月一日押已而不果行

論行宮冒賞劄子

臣聞唐德宗狩奉天自廢洋州以來百姓進獻瓜果欲各與散官陸贊以為不可且曰爵祿天下之公器而國之大柄也惟功勲才德所宜處之夫散官虛名也贊猶力爭至數千百言而已誠以所繫者重也臣伏聞上皇東巡州縣供饋無闕此乃臣子之常分何足為功兼

供饋之物自一毫以上皆行人及坊郭鄉村有物力之人非出供饋者之家也供饋愈辦則剥民愈深臣訪聞其間巧於謀身者多是交結近習縱其請求需索無藝往往緣此得其歡心揄揚贊美達之上皇遂致增秩賜金行宮如市有再任者有進三官者有名赴都堂審察者恩賞僭濫非散官之比也陛下修明百度抑絕奔競如此而士大夫冒犯廉隅僥倖苟得如彼況上皇鑿輿還闕將士冒行陣突鋩鋒以衛護社稷者或橫尸原野

或暴露邊陲未聞少加恩典而首及州縣猾邪之徒非
所以示天下之公也所有已降遷官進職等指揮伏望

聖慈特賜寢罷以安人情臣無任激切待命之至取進

止五月二日奉聖旨上皇經由道路宣力之人
可依下項寧陵知縣趙子游等各轉官有差

論王氏及元祐之學

臣愚昧樸拙當陛下初政偶承乏擢賓言路每因進對
備聞德言未嘗不以紹復祖宗法度為說忠臣義士莫
不懽欣鼓舞日須德化之成也臣今月十七日入臺伏

覩三省降到黃榜一道臣寮上言以王安石為名世之學發明要妙著為新經天下學者翕然宗師又言熙寧元豐間內外安平公私充實法令備具賦役均平其意專以王氏之說為是公肆誕謾無復忌憚以陛下聖明未可遽欺既以司馬光與安石俱為天下之大賢又云優劣等第自有公論觀言者之意必不肯以光為優以安石為劣夫光與安石行事之是非議論之邪正皎若白黑雖兒童走卒粗有知識者莫不知之當熙寧元豐

間如韓琦富弼歐陽修之屬尚皆無恙安石惡其議已
皆指為因循之人擯斥不用卒以憤死恭惟太祖太宗
創業之艱難真宗仁宗守成之不易規模宏遠矣安石
欲盡廢祖宗法度則為說曰陛下當制法而不當制於
法欲盡逐元老大臣則為說曰陛下當化俗而不當化
於俗蔡京兄弟祖述其說五十年間搢紳受禍生靈被
害海內流毒而祖宗法度元老大臣掃蕩禁錮幾無餘
蘊矣幸賴宗廟社稷之靈上皇悔悟以祖宗不拔之基

全付陛下今言者又創為熙豐之說以安石為大賢臣
恐此論一出流聞四方鼓惑民聽人心一失不可復收
非朝廷之福也

欽定四庫全書

莊簡集卷九

宋 李光 撰

奏議

論蔡攸欲潛入都城劄子

臣伏見蔡京父子當國日久，竊弄威柄，敗壞紀綱，使朝廷失信于四方。至上皇負謗于天下，軍民怨憤士論沸騰。前後臣寮論列非一，其它元惡巨姦悉已竄逐。獨京父子尚遲回近甸，未正典刑。訪聞攸不自引避，欲以扈

衛行宮為名僥倖入都竊聽民言深可憂慮若攸果入都城則百姓必致生變萬一驚犯上皇屬車之塵則臣坐不預言之罪伏望陛下特降睿旨早賜黜責施行

議太上皇后還宮之儀狀

臣近覩禮部關報太上皇后先次還宮陛下屢降德音戒勅有司繕治擷景園易名寧德宮務極閑麗以稱崇奉之意使命往來不絕于道陛下每於艱危擾攘之時延見羣臣憂形于色未嘗不以暴露為念此於太上皇

后可謂無負矣臣聞近日外議藉藉咸謂太上皇后輕信小人之言遣使切責陛下臣在外庭不知何事妄傳欲開宣德門入居大內羣臣士庶莫不惶駭以臣料之萬無此理設或有之此豈太上皇后保全鄭氏之意哉恭惟道君太上皇帝上畏天戒下順民心以宗廟社稷之重躬行堯舜之事退居潛藩以神器付陛下大内者天子之居神器所在也使無纖芥之嫌陛下欲便溫清之養迎奉入內亦當躬稟上皇下有司討論典禮如漢

唐故事繕營宮室嬪嫱暫御嚴為限隔以防意外之變
縱陛下母子慈孝萬無他嫌其如左右近習之人懷姦
結怨搖動兩宮則蕭牆之憂不可不慮伏望陛下明詔
三省樞密院大臣速議太上皇后還宮之儀以全陛下
母子之愛臣不勝激切待命之至

論在京擅離官守人一等科罪劄子

臣竊惟聖主制世御俗之方莫大於賞罰所以行賞罰
者莫先於至公古者爵人於朝與衆共之刑人於市與

衆棄之明不敢以已之私恩廢天下之公議也臣伏見
金人內侵都城危逼士大夫委職而去者五十二員近
緣臣察論列有旨令吏部具職位姓名送大理寺根勘
約法斷罪陛下示天下大公之道可謂盡矣命下之日
士論紛然或謂罪同罰異致陛下有失刑之譏大臣負
黨姦之謗不可不察如衛仲達張勸馮溫舒蔡行兄弟
皆從官也林虞劉燾袁植皆致仕也在仲達勸則除名
勒停虞則追五官除名勒停行兄弟及溫舒燾植則置

而不問或旋求名目如蔡績蔡續者或妄託假故如許
行宋時者種種姦欺莫究虛實其為擅去官守一也今
詐冒者反得輕典孤拙者多陷深文陛下既已付之有
司法者天子所與天下公共也原情定罪不容有所輕
重況得而私之哉伏望聖慈將大理寺定斷到應干逃
避臣僚係在去年十二月十七日已後不問有無事故
盡作擅去官守一等坐罪庶幾公道昭明人言弭息不
勝幸甚取進止

論劉延慶等劄子

臣聞易曰師出以律否臧凶言治衆而不用法無不凶也故曰將軍死綏咫步無却顧望避敵逗撓有刑我藝祖以英武定中原養兵止二十餘萬懲罰訓練一按師律嘗曰唐莊宗二十年夾河戰爭取得天下不能以軍法束此輩縱其無厭誠為兒戲朕撫養士卒不吝爵賞犯吾法者惟有斂耳故能南征北伐洒濯氛祲神威所指無不從志誠御將得其道也臣伏觀近年以來將帥

之柄付之宦官兵政不修賞罰不嚴馴致前日敵騎充斥瀕漫兩河非小變也幸賴宗社之靈陛下神聖得天人之助金人退師宜於此時修軍政以耀威棱明賞罰以聳羣聽擇其悞國生事罪狀明白將士怨憤久稽天誅如劉延慶父子者重置典憲以勵三軍平燕之役延慶提數十萬衆當契丹殘破之師兵鋒未交一夕遁去芻糧器甲委為盜資兵夫枕藉填滿坑谷挫損國威莫此為甚金人緣此遂有輕侮中原之意其子光世光國

亦皆凶悖專恣傲睨不恭近者金人圍守太原事勢危急朝廷遣光世赴援既遷延不進反與折氏為仇旋致敗衄擁兵奔逃光國頃為陝西提刑陵轢州縣五路官屬畏其凶談尋醫侍養託故解職者不可勝數令兩路用兵防秋在近正藉將士用命以守禦邊疆以衛護王室如延慶父子蒙國厚恩一門之內建籍正任園地田宅歌童舞女志滿意得不復以朝廷大計為念及种師中姚古王元之流皆陞下親擢元為真定總管師中為

河北制置使古為河東制置使委任華重亦復偃蹇自肆使之禦敵則望風先奔使之策應則逡巡不進用兵行師如循一軌若此之類朝廷未嘗少加詰問有罪不坐犯法不誅此皆異時因循姑息之政亦何以感勵將士使之仗節死難者乎前日失守追斬梁方平驕將惰卒孰不知懼以陛下英明當今日外國內侮之時制軍御衆若不稍加裁戢但務涵容苟玩歲月遂使忘身效節率衆先登者獲譏於士卒債軍蹙國緩救失期者自

以爲智能義士痛心勇夫解體豈不殆哉伏望明詔三
省密院大臣將自來姦欺罔功罪惡顯著最為敵人所
譏笑如延慶等重賜顯戮傳首邊城或鐫削官職竄流
遠方庶幾邊將革心軍聲大振賞罰當而功罪明威令
行而軍政肅矣不勝幸甚取進止

乞用河東土豪援太原劄子

臣近因進對伏見陛下以太原圍閉日久援兵無功深
軫宸衷憂形于色臣退與寮屬具言今日之患誠無急

於此者臣東南書生豈知為兵因輒詢求博采衆議及河東士大夫有訪臣者皆言方令事勢危急忻代二州已為敵境澤潞汾晉又遭劉嗣初殘破富家大姓往往奔走四出獨力田之民戀著鄉土多自團成保甲守護鄉閭朝廷若起而用之可得土民十餘萬人人自肯為戰蓋子弟之衛父兄手足之捍頭目其勢然也今朝廷兵力單弱四方兵未有至者萬一太原不守則河東決非朝廷之有若恤小害則大患不除欲望聖慈逐急就

委折彥質盡起晉絳慈隰澤潞威勝汾州八處民兵自
二十已上五十已下及本路諸侯弓手令見任州知通
縣令佐據所統屬各自部轄其間亦有土豪及士人願
為頭首者甚衆若假以初等官及應副器甲使與官軍
協力赴援比之他路起兵無逃竄剽掠之患減飛芻輓
粟之勞人自為戰家自為守功必倍之仍乞先遣信使
齋詔書諭以禍福人心樂從出夫之家給復三年州縣
敢逗撓者並以軍法從事愚計如此儻粗合聖意乞詔

三省樞密院大臣詳議施行取進止

再乞起河東民兵狀

臣近嘗具奏乞盡起河東民兵赴援太原乃是臣呼召平陽府進士刁處仁等商議為臣言力田之民頗懲著鄉土各自團成保甲咸有鬪志若起而為兵比之他路無逃竄剽刦之患減飛芻輓粟之勞其言似可採用未蒙施行今河東士大夫避地至都下者甚衆其刁處仁等亦各願隨逐使人前去乞下臣章樞密院令出榜召

募詢訪謀策庶有裨益謹錄奏聞伏候勅旨

論胡直孺劄子

臣伏覩近除胡直孺為工部尚書命下之日士論沸騰
莫不疑駭蓋直孺素結朱勔為發運使為待制知平江
府為戶部侍郎皆勔力也臣近論朱勔及言東南財用
為羣小侵蠹直孺其一也老而無恥素節凋喪不足汚
八座之選覲顏朝列不自引退伏望陛下斷自宸衷重
行竄黜以為士大夫不顧廉隅者之戒取進止

論胡直孺第二劄子

臣近再上章論列工部尚書胡直孺罪惡已蒙陛下開納許以必行亦既累日不見降黜此必大臣以直孺為賢曲加覆護以臣言為妄未肯施行夫大臣以進退人材為職所進忠賢則國家享其利所進檢佞則人主受其欺陛下不以臣不肖使得待罪言路若大臣用人失當臣得而論之朝廷行之則陛下威權立矣今臣力言之陛下虛己而聽之大臣沮抑之則是陛下威福之柄

反制於大臣而臣區區不能但已者也况直孺佞邪天下所聞與應安道盧宗原相繼為轉運使及發運使欺罔朝廷如循一軌將上供物料及糧綱船盡充花石之供號為應奉州縣帑藏為一空起發封椿妄稱均糴歲計不足猶進羨餘緣此進職濫廁從班遂知平江府縱朱氏請求益肆掊斂不復知有朝廷矣直孺素畜聲妓每攜就朱氏園亭與倡優雜處啗其子姪吳民怨憤目為朱家奴勔入京師凶燄益熾至與宰執爭權竊弄國

柄首引直孺為戶部侍郎搢紳側目莫不駭歎伏自陛下即位灼見姦凶以次流放黨類屏息獨直孺反被褒擢聯八座之選命下之日士論沸騰前後臣寮論列不一伏望陛下斷自淵衷速賜竄黜以為多士之戒如臣所奏失實欺罔聰聽亦望解臣言職重置典憲臣與直孺理難兩存臣不勝激切待命之至取進止

論燕瑛胡直孺劄子

臣伏見燕瑛胡直孺二人以姦佞相濟傅會匪人用事

專權恣為不法盜用官錢如同已物刻剥細民甚于豺虎前後臣寮疏列罪惡瑛頃任廣南市舶專以貨賄交結近倅目為香燕及為開封尹專任猾胥政事紕繆輦轂之下寇盜縱橫褫職居外曾未旬月百計經營由散官徑為戶部尚書直孺任兩淛漕臣假託應奉耗竭帑藏醜穢之迹中外所聞知平江府謫事朱勔日三造其門勔所欲為無求不獲家畜聲妓專事媚悅以圖進用名教所棄清議不容陛下灼見姦慝亟議誅竄今二人

皆帶龍圖閣直學士名曰罷斥其實陞遷自祖宗以來
非名德重望為士類所推者未易得此陛下始即大位
慎重名器愛惜生靈之時如使此流列顯職當郡寄臣
恐四方忠義之士不以聖朝爵祿為榮人人解體羞與
比肩恐非朝廷之福臣與瑛直孺實昧平生所以拳拳
不已者誠見陛下慨然思治乃於賞罰功罪輕重失當
未能厭服人心實累聖治伏望陛下奮發乾剛大明黜
陟將此二人鐫職投閒庶協公論臣不勝憤激之至

再論燕瑛胡直孺劄子

臣竊謂監司郡守號為近民之官勢力氣燄足以制百姓死生之命頃者姦倖當權奢淫無度竭生靈之膏血不足以供谿壑之欲於是分遣親信之人忍為殘賊敢為姦贓者布滿州縣夤緣假借上下相蒙其剥民愈甚則獲賞愈多如應安道徐鑄之流死亡畧盡今其在者蹤迹顯露莫如燕瑛胡直孺二人皆自郡守監司以贓汙致身臣累具彈奏必蒙陛下委曲開納臣亦委曲為

陛下言之若以朝廷多事之際以為有材亦當置在三
邊財穀之地不當佚以宮祠優以便郡也今乃反得輔
郡地望愈隆沮天下至公之論成僉人怙寵之私成命
既頒物議沸騰此必大臣有陰為之地者二人平昔止
能以珍奇貨賄交結權倖飲饌聲伎媚說要人身雖去
國各留子弟見在京師日造大臣之門對衆附耳營求
百端稔惡弗悛無復忌憚伏望陛下奮發威斷直批付
三省褫奪職名重行竄殛以解四方之疑不勝幸甚取

進止

論燕瑛胡直孺第三劄子

臣累論列燕瑛胡直孺不當寵以峻職蒙陛下開納許以必行至今累月未見褫奪瑛關通交結皆出宦官直孺拔擢悉由朱勔此陛下所知也夫人主之於臣下患在不知其姦苟或知之而復赦之則小人放縱無所忌憚矣故知善而不能用與知惡而不能去誠人主之深戒也今此二人非獨臣知之天下之人莫不知之臣若

不言則負陛下言之則觸大臣儻大臣以直孺等為才
當多事之際欲湔洗而用之則當置在三邊兵刑財賦
有用之地尚為有名不當佚以宮祠優以便郡也臣誠
愚瞽官小言輕非仰恃陛下優容勢必不敵伏乞檢會
臣先後所上文字降付三省早賜施行取進止

論王子獻等劄子

臣近准尚書省劄子專委臣取索點檢京東京西兩路
西城所創置擾民等一切並罷元係西城所辟置及曾

應副害民之官先次放罷具名聞奏除已一面令吏部
供具本路州縣官外臣令所聞兩路最為李彥信任陳
獻利便創立租稅忍於害民為國斂怨僥冒賞典轉官
除職之人其尤甚者京東則有王子獻呂屹毛孝立京
西則有劉寄杜徽彥李端愿子獻為京東轉運使將梁
山樂收入西城所辟置孝立屹為屬官徧詣州縣自濟
兗鄆濮興仁廣濟等處為之騷然迫脅官吏抑勒細民
有不承佃者便枷項送獄人人惴恐莫保性命蒲魚荷

焚之利皆日計月課纖悉無遺遂致滌傍之人無所衣食强者結集為寇盜弱者轉徙乎溝壑屹孝立皆驟被拔擢自文林郎不二三年轉至朝散朝請大夫自曹官為通判自通判為郡守監司又孝立任濟州日母死其父欲只作所生規免解官未幾父又死遂干求李彥請御筆候葬畢起復孝立家本三衢憚往返迂遠不復挈喪歸鄉只就濟川營葬近緣廉訪奏劾國忌日就司錄廳用妓樂深夜飲燕為臣不忠為子不孝敗壞風俗莫

此為甚寄徽彥端愿或自白身或由小官為李彥汲引
將唐鄧汝蔡四州九縣取民間稅地謂之公田斂取無
藝百姓失業流丐者衆風諭諸邑催索租逋急於星火
確山令劉愿前後杖下決死良民千餘人徽彥近緣金
人內逼添差京西運判分遣屬官四出有甚寇盜襄城
一邑科率至十七萬謂之助國錢更不抄上赤厯此數
人者朝廷雖已放罷而罪惡貫盈公議未允伏望陛下
洞照姦惡久為民害特發睿斷重置典刑或竄流嶺表

以謝兩路生靈不勝幸甚取進止

再論王子獻等劄子

臣近准詔旨姦貪之吏蠹國害民者尚未竄逐所以好惡未孚贓吏未懲民未被澤臣職在臺端仰煩聖訓宣諭使之彈劾在臣愚分誠為失職臣伏自供職首尾半年前後論列姦貪之吏多矣陛下雖有聽納之明而未見力行之果臣輒再具已嘗論奏而未蒙施行者如京東轉運使王子獻前知淄州毛孝立前東平府通判呂

亟前京西轉運使杜徽彥提舉常平李端愿劉寄此六人者皆奴事李彥竭兩路膏血以奉彥者假借事權勢力氣燄足以制百姓生死之命彥非得比六人亦不能成其姦凶如此其暴也臣聞此一等人其類尚多自陛下初政灼見姦慝雖已落職送部止是退居鄉里復帶前銜金章紫綬所在州郡皆以嘗任郡守監司往往差破人從日陪燕遊無復省躬念咎之意亦莫有依元降指揮赴吏部受差遣者是陛下賞罰號令止行於小臣

而不行於大吏伏望檢臣前奏重賜竄逐仍乞行下吏部取責前後送部臣寮如有傲睨偃蹇不肯赴部之人即與直注遠地或河北河東合入見闕差遣庶幾方命慢上者知所警懼不勝中外之幸取進止

七月二十六日奉聖旨王

子獻等並送吏部注遠小監當

論王雲等劄子

臣近嘗論列同簽書樞密院事宇文虛中給事中王雲身為士大夫職列侍從朋附童貫贊助開邊使兵連禍

結及敵騎內寇朝廷憂危將命募兵逗撓不進前後臣
寮交章定虛中雲罪與王蕃等蕃已責授散官安置議者
猶謂輕典獨此二人赦而不誅已駭物論今乃反置近
列居密勿獻納之地急則用計而脫禍緩則詭辭而冒
榮專為身謀無復人臣之節兼近年以來士大夫交結
宦官寢以成俗虛中為翰林學士雲為中書舍人皆朝
廷華選貫皆倚為腹心每用兵行師皆有將帶前去之
語覲顏就道曾無愧恥陛下初即大位拔用人材宜以

禮義廉恥風厲士類若不痛加懲革則後來者更相倣
倣廉恥之道愈喪而禮義之俗寢隳矣夫人君養士之
廉恥所以重其國士之有廉恥亦所以重朝廷唐李鄆
恥為吐突承璀所引卒辭相位史氏書之以為美談令
虛中輩姦貪趨利庸近凡鄙交結近習迹狀明白辱國
甚矣伏望檢臣前奏付外施行早賜罷黜以厭公論不
勝幸甚取進止

論王子久劄子

臣伏見陛下即位之初承姦兇用事四方凋弊國用匱乏之後兵政不修將卒驕惰城池樓櫓未經修葺一旦金人掩至城下四方勤王之師未有至者人人惴恐士大夫至委職而去危急甚矣獨陛下奮發乾綱宵衣旰食經營備禦慨然策勵二三執政大臣固守宗社將士戮力人心安固都城百萬之家無一動搖者伏自金人退師益修守禦之具戒畿甸之兵為保伍之法召諸道之兵為赴援之期東南轉粟舳艤相銜選將陳兵常若

寇至陛下固守都城之志可謂堅矣為臣子者義當率
心協力宣布德意使遐邇之情莫不安帖臣訪聞中亮
大夫同州觀察使知東上閣門事王子久世襲膏梁無
所知識輒敢對衆宣言建避地之策動搖朝廷規喧衆
聽外廷傳播莫不駭愕流聞四方為害非小欲望陛下
特出睿斷將子久重行黜責仍乞速降詔旨布告中外
以靖國人不勝大願取進止

乞假借臺諫委任大臣劄子

臣伏見陛下自即位以來懲父前日姦邪當國杜塞言路之弊於是增置諫員雖憲臺六察咸得言事又許臣寮實封投匱職事不應上殿人亦得奏對開公正之路閑私邪之門海內聞風莫不稱慶今纔數月未聞用一直言得一賢士而言路寢復有壅塞之患近降指揮奏事既罷不得從容留身不合上殿人雖有指揮亦令覆奏臣知陛下有厭言之意矣諫官御史不稍假借一言忤意旋被斥逐臣知陛下有拒諫之實矣陛下貴為天

子富有天下如天地之無不覆燾日月之無不照臨而懷疑偏任惴惴然惟恐羣臣之欺已此得御姦邪之術而未得任忠賢之道也陛下所謂親除者一舉而得余應求再舉而得陳公輔此二人者今乃迎合大臣或為游說例被斥逐使誠有之是親除之人豈足信任乎以天下之大四海九州之廣而陛下欲以耳目所及擢用一二士大夫所任未必得人而先已失衆心矣衆心一失人懷疑貳不知孰與共守天下者乎不亦所得者小

所失者大乎耿南仲為東宮官輔導陛下十有餘年此
腹心之臣也雖甚愚陋之人莫不知之而李綱敢與抗
論詆許其短此其疎率無謀可知矣而謂懷姦以事陛
下則非也彼懷姦以事陛下者知南仲不可動搖則陰
交而固結之上可以保寵榮下可以行私意而天下安
危社稷存亡則有時而不暇卹夫南仲與陛下同休戚
利害者其設心豈有他哉特其所見或有偏係不通之
處未能曠然使陛下以大公至正之道照臨百官撫御

寰區也臣恐姦邪之徒窺見陛下好惡更相譖毀迭相
媒孽無忠信仁厚之風成猜忌刻薄之政人人惴恐莫
肯披露情實以事陛下伏望稍回淵慮假借臺諫則盡
聽納而容狂直禮貌大臣則專委任而責成功臣誠狂
愚不識忌諱有所聞見懷不能已伏惟陛下留神聽納
天下幸甚

乞擇臺省官節錄封事劄子

臣伏見陛下自即位以來懲創前日姦邪當國杜塞言

路之弊於是增置諫員憲臺六察咸得言事猶以為未
也又許臣察實封投匱職事官不應上殿人亦得引對
開公正之路杜私邪之門海內聞風莫不稱慶今纔數
月未聞旌一直言用一正士而言路寢復有壅塞之患
近降指揮奏事既罷不得從容留身不合上殿人雖有
指揮亦須覆奏議者謂陛下有厭言之意矣祖宗假借
言事官虛懷聽納雖布衣之士必須溫顏誘接至有辭
氣狂悖者未嘗加罪令諫官御史一言逆旨旋被斥逐

議者謂陛下有拒諫之實矣況今姦諛未盡去蠹壞未盡飭邊方未寧百姓遺竭更張廢置未盡合天下之公論慷慨獻忠者當累及之或謂陛下已厭封事之多不暇省覽或付之三省密院大臣門人子弟得以傳播誠為非便臣伏見仁祖時嘗委張方平司馬光詳定中外所上封事盡心料簡合於義理可施行者雖文采不足一一奏聞光與方平亦嘗奏乞其間識慮稍出於衆開陳政體時務文理詳明者乞特賜召對面加詢訪果有

可採密籍姓名隨材擢用今太平日久誠為多士之時
所獻封章豈盡無可觀採臣愚伏望聖慈檢會祖宗故
事專委兩省或臺諫官二員擇其公忠端亮者俾之遴
選據所可取者節錄成冊每季進呈以備乙覽忠言嘉
謀庶有裨益以輔成陛下中興之治天下幸甚

論貶逐臺諫乞不施行日下出門指揮狀

臣伏覩前諫議大夫唐重等五人與郡日下出門流傳
四方士論驚駭陛下新即大位開懷聽納之初宜優容

直言禮遇臣下令重等備員臺諫不知所論何事既令
日下出門議者遂致紛然造飾語言稱師驥論十事孫
覲李擢等攻擊宰執緣此被逐蓋朝廷未嘗降出得罪
之因宜其紛然有以議陛下也重等既各與便郡如同
狀和皆天下膏腴處正使自擇不過此耳何至迫逐使
之倉皇若此哉臣伏見祖宗朝斥逐言官雖遠在嶺外
未有日下出門者熙寧中王安石為相急於行法惡人
之議已始有此行遣後來蔡京王黼用事欲行已私循

用此例緣此言路塞絕豈可施於今日艱難之時哉伏
望特降睿旨將日下出門指揮更不施行庶令般挈家
屬收拾行李以示陛下優納之意

乞戒在位揚職奉法劄子

臣嘗謂文王序易以乾坤為首孔子繫之曰天尊地卑
乾坤定矣卑高以陳貴賤位矣言君臣之位猶天地之
不可易也先王因制天下使尊尊相高貴貴相承名以
命之器以別之四方仰視朝廷之尊羣后翊戴人主之

勢故能消患折衝姦人無窺覬之意昔漢高祖以馬上得天下韓彭輩論功議賞至拔劍擊柱漸不可制叔孫通制禮儀諸侯王以下莫不震恐肅敬於是高帝曰吾乃今日知為皇帝之貴也陛下踐阼之初敵人侵侮國勢搶攘執政大臣議事喧鬨於上士民伏闕詬詈於下士大夫一旦習為苟簡三省六曹百司庶府官吏因循不復治事伏望陛下俯從羣臣之請申勅有司擇日御殿欵謁宗廟然後誥誠列位各揚乃職有不奉法者御

史臺閣門覺察以聞庶幾隆主勢而正朝綱實天下幸甚取進止

卷九

欽定四庫全書

莊簡集卷十

宋 李光 撰

奏議

論國是劄子

臣聞楚莊王問于孫叔敖曰寡人未得所以為國是也
叔敖曰國之有是衆非之所惡也君臣不合國是無由
定也夫以區區之楚欲立國定制猶知所審况陛下紹
膺大統撫御寰區當中外多事之時羣趣殊方衆志異

慮可不知審所是而定之乎伏見陛下即位以來敵人
內侮國勢搶攘寬大之令數頒求言之詔屢下巨姦元
惡斥逐殆盡忠臣義士聘舉無遺凡所以收人心者可
謂至矣而廟堂之上所與協心圖治者不過六七執政
大臣乃復牽于浮議各營己私噂沓背憎結怨嫁禍莫
肯慨然以天下為已任者方今民勞官冗將驕卒惰外
則邊境繹騷內則財用匱乏此誠國家危急之時陛下
憂慄焦勞于上而羣公大夫族談竊議于下學校之士

不務宿業而以投匱為課程縉紳之徒不循分義而以
押闔為職任自白身而登儒館由選調而參廟謨祖宗
以來所未有也行姑息之政苟且之習爵祿濫冒名器寢輕
因一夫流言為變法易令者數矣人主威權何時而立祖宗法
度何時而行朝廷綱紀何時而定此實社稷之深憂也臣
愚伏望聖慈明詔大臣深加訓敕察其邪正辯其臧否
熟問深思求合理道然後斷而行之疑其為姦則如勿
任知其可任則不必疑奮乾剛以明黜陟隆委任以責

卷之二
成功庶幾國是定而法制立矣天下幸甚取進止

引對人乞先經三司劄子

臣伏見陛下踐阼之初下詔求言虛懷聽納雖疎逖小臣間或引對親賜詢考將以開廣言路簡拔雋髦此盛德之舉也臣愚竊慮陛下驟當幾微臣下忠邪未易洞照其間頗有利口辯言乘時僥倖以徼寵祿姦人窺覬名器寢輕而實材忠樸之士往往恥於自售甚失陛下所以惻怛訪逮之意欲乞今後臣寮非本職合上殿人

委三省大臣博采公議先次審察如委有行實及策畧
議論過人即令引對庶幾抑絕奔競以來僞異之士取
進止

論李會李擢劄子

臣伏覩除目以李會李擢為左右司諫訓詞褒諭以首
論蔡京有功特被召用外庭之議無不駭愕臣之區區
亦所未喻夫首論蔡京者陳瓘也其次則有石公弼張
克公毛注之流相繼彈擊上皇覺悟既罷而復用者數

矣京與王黼前後用事權傾天下言路塞絕多士盈庭
莫敢開說方是時也忠義奮發不避死亡之誅慷慨言
事不過曹輔等三五人爾下逮韋布之士廷對大問進
藥石之言則有若范宗尹投匱獻計箴時政之失則有
若朱夢說而會擢在當時迭為臺官身任言責保寵固
位被阿諛之譏目覩時事曾無一言逮陛下龍飛灼見
姦慝太學諸生伏闕上書首論六賊之害蔡京之惡夫
人而能言之矣諫官御史能於此時明目張膽擊姦指

佞實恃陛下聖明不啻摧枯拉朽之易何足為功況會
擢當金兵圍逼都城力附白時中李邦彥專主避敵割
地之謀方肅王之北渡也不罪金人之渝盟乃敢奮筆
橫議以上皇還宮問肅王所在刦持上下必欲以祖宗
基業委之敵國至有三鎮與王室孰重之語章疏具存
可以考按今時中邦彥坐是落職議者猶謂輕典而會
擢反被召用復預諫爭之列不知誰為陛下薦此二人
者陛下好惡取舍如此廟堂之論何時而定百官有司

之衆何所適從乎臣愚伏望陛下深思熟察辨邪正之
歸無為詭辭偏說之所傾奪庶以仰稱陛下艱難求助
之意副四方跂竦之情所有會擢等召命伏乞特賜寢
罷以安衆情取進止

乞出第一劄子

臣出自寒鄉服勤州縣踰二十年學問荒落風節無聞
比者伏遇陛下龍飛偶承人乏擢置言路亦既閱時志
弱膽薄不任彈擊聞見淺陋無所建明夙夜震恐罔知

攸濟大懼仰負陛下任使之意伏念臣頃緣狂率遠貶
嶺外還朝未幾復以妻室喪亡家貧子幼私計逼迫兼
臣與令御史中丞陳過庭實有鄉閭之舊不無明比之
嫌接武憲臺義當回避伏望聖慈特賜矜憫出於迫切
非敢矯偽除臣一合入差遣使得從容歲時陛下不忍
終棄臣或未填溝壑復得收召東西南北惟命是從臣
不勝哀祈激切之請奉御筆所乞不允
仍不得再有陳請

乞出第二劄子

臣近具劄子以不任彈擊無所建明乞在外一合入差
遣蒙陛下批答所乞不允仍不得再有陳請臣疎遠微
賤仰惟陛下寵遇之厚恩旨之嚴不敢再有塵瀆夙夜
震惕進退徊徨臣伏見陛下以邊方未寧有當食忘餐
之語義當捐軀以圖報稱顧臣實東南書生材力縷薄
內之不能竭愚夫千慮之得外之不能效戎行一旅之
用而陛下虛心訪逮發於懇誠聖心焦勞中外歎仰豈
臣之分尚得晏然况今豪傑志義之士介特隱淪之賢

彈冠結綬願立王朝誠非乏材之時而臣久處要塗實妨言路臣雖有喪葬婚嫁之迫當茲急難豈敢僥倖東南差遣以便私計或蒙陛下哀憐別除臣一閒慢去處或京東西小郡使之推行詔條撫循凋瘵臣亦久在州縣粗諳民情庶幾勉竭愚短以報萬分伏望睿明俯憐悃愞特賜俞允取進止

再乞出第一狀

臣近嘗兩具哀懇仰瀆聖聽乞東南小郡犬馬之誠雖

自謂切至終未足以動天聰之崇進退隕越莫知所為
臣切自念猥以庸愚遭值陛下初政首置言路閱時既
久訖無涓埃少報萬分仍積罪悔上煩保全若日復一
日必至顛躋兼臣近年因遭禍患志氣摧傷久得怔忪
之疾比數發動難以冒居繩糾之地伏望赦其狂愚特
賜矜憫除臣小郡或宮祠差遣一次使退處閒散之地
將理衰疾萬一未填溝壑尚當糜捐仰報聖造臣自今
月二十七日更不敢入臺臣見居家俟命無任祈懇激

切之至謹具狀奏聞伏候勅旨

再乞出第二狀

臣近嘗具奏牘以不任彈擊等事乞在外一合入差遣
至今累日未蒙施行臣輒不避斧鉞之誅再瀆冕旒之
聽伏念臣流落之久自去年五月還朝遭罹禍釁妻室
喪亡家貧累重難以久任京局自春夏以來嘗因進對
備憲誠懇累乞解罷言職聖恩深厚未賜矜從兼臣久
在臺端才力縟弱無所建明難以冒處言責之地雖陞

下天地父母覆燾涵容未即罷遣在臣愚分實不自安
伏望檢臣前奏除臣東南小郡或宮觀差遣一次伏惟
睿明俯矜微賤哀而憐之特賜俞允冒犯天威臣無任
惶懼激切之至謹具狀奏聞伏候勅旨

論彗劄子

臣聞易曰天垂象見吉凶聖人象之蓋觀乎天文以驗
得失者誠聖王之先務也臣伏見近者彗出寅艮間躔
度甚速此變易之大者或傳朝廷用陰陽家說以分野

言之為敵人滅亡之證此恐導讒之人以甘言諂辭媚
悅陛下輕信其說無復答謝天譴之意則虧損盛德非
宗廟生靈之福臣聞孔子作春秋不書祥瑞而書災異
者蓋欲警戒人君而知恐懼修省以應天變不聞以災
異歸敵人也二百四十二年之間彗星三見禍亂輒應
周室微弱上下交怨此皆人事之所感動也天心仁愛
人君故出災異以譴告之不聞天心仁愛遐荒欲其修
省也陛下萬一惑于邪說凡天地變動各以分野言之

則陛下之失自今以往誰復敢言蓋天變之發或發于
未然之前或發于已然之後皆所以覺悟人君也所謂
應天變之術豈有他哉在於修人事而已臣伏見陛下
自即位以來凡所施為無非仰合天心下當人意者勤
儉憂勞不聞有過然舉措之間安得每事皆當亦當窮
究致彗之由推至誠行直道政事之不中不平者或未
加治萬民之失業窮困者或未加卹姦邪之徒熒惑主
聽者或未加察言路駁駁復有壅隔之患則陰陽之和

何時而致天地之變何時而息乎臣所以居言責之地
而不能默默也冒犯天威臣無任激切恐懼之至

論治道劄子

臣嘗謂帝王者神民萬物之主也以一身而寄天下之
上所恃者衆心之所戴也厯考自古興衰撥亂之君未
有不因乎人心而能有為者蓋觀人心之所與則知天
命之所歸故敵國之盛強或不足畏盜賊之猖獗或不
足憂中原之竊據或不足慮關陝之捷奏或不足喜臣

願陛下凡所舉措務合人心而已今移蹕之初扶攜之民歸往如市海內顚顚皆托命於陛下士民傾屬以觀聖化之行則今日之所施為安得不汲汲乎昔梁襄王問於孟子曰天下惡乎定對曰定於一孰能一之對曰不嗜殺人者能一之孰能與之曰天下莫不與也又曰不行王政爾苟行王政四海之內皆引領而望之欲以為君夫豈在乎山河之固甲兵之利土地之廣哉臣願陛下克己恭勤隆道德於上大臣守法奉公肅紀綱於

下明賞罰辨邪正懲汙偽之黨以砥礪名節去姦賊之
吏以惠養小民容受直言駕馭英傑如是而人心不歸
海內不服未之前聞也惟陛下留神省察取進止

乞廢常平主管官罷發運司劄子

臣謂今日之急務莫切於理財而理財之政有避其名
而因失其實者有無其實而徒存其名者固未易槩舉
令姑論其大者其事有二常平之法本於漢耿壽昌令
州縣錢穀有屬常平令者名色非一悉總於戶部右曹

令乃以王安石之故而廢之既使香鹽司兼領又別差
主管官一員有司莫之適從錢穀因致失陷豈非避其
名而失其實乎發運司本以總六路財計以漕輶中都
餽餉為職兵興以來既無轉輸今乃以糴買事委之其
本錢盡從朝廷給降無慮五六百萬緡又以淮南摠制
司及諸路失陷入易市易贍軍等錢歲亦不下數十萬
緡此國用所以益窘也臣愚欲望聖慈特降睿旨廢常
平主管官依舊令香鹽官兼領罷發運司其糴買摠制

等事令戶部侍郎專領庶幾名正而事成官省而職舉
不勝幸甚取進止

乞免放散民兵狀

契勘近緣金人渡江侵占建康府大隊復陷廣德軍明
越秀州幸賴官兵同保甲用命防托把隘得保無虞今
月初三日準德音一項應調婺州縣鄉村民兵把隘候
德音到限一日放散訖申尚書省緣見今大隊方離臨
安府取蘇秀路前去及建康府并淮南敵騎未退近日

又被殘破太平州相去本州界不及五七十里人情震
恐正藉民兵同官兵把隘守禦日下未敢放散更合取
自朝廷指揮三月二十五日奉聖旨

候敵兵退日審度放散

乞罷王淵焦師叔狀

臣竊見本州新兵馬鈐轄武功大夫焦師叔前任平江
府鈐轄到任未及數月因敵騎侵突作緣故離任兼本
官既係掌兵若已失守雖朝廷寬恩放罪難以便除一
般差遣下政已差武功大夫忠州團練使王淵係內臣

王仍之子纔二十餘歲竊緣本州密邇江岸正係緊切控阨之地防秋之際全藉官兵戮力捐軀以捍寇盜其王淵童騷無知焦師叔愴猾二人皆難倚仗伏望聖慈別選有材武忠實之士填上件窯闕庶幾緩急之際不至闕事

乞進兵狀

昨自建康失守右僕射杜充退守儀真陳邦光李棁率吏民迎降金人大隊由境上入浙游騎晝夜侵逼及防

江潰兵四散剽掠幸賴朝廷威德將士協力防守至今臣探得建康所留敵騎不過數千人金蕭張二大帥與陳邦光李悅同治府事時復遣兵及黃旂招誘州縣如溧水等處縣官皆已投拜本州實與接境人情反側不往分遣將士前後殺獲首級招安到潰兵僉軍班直契丹渤海等處人兵多方存養譏察外臣近據於潛知縣通直郎陳近仁昌化縣尉保義郎平協申去年十二月二十日金經畧使稱四太子郎君金知臨安府李傳差

修武郎樂宏齋文字黃旂前來臨安於潛昌化等縣招撫官吏本縣官吏各奮忠義遂將樂宏等四人斬首其臨安餘杭知縣將帶老父入城投拜邀請敵兵就縣敷買金銀足帛又於今年正月初十日再遣凌秀才王秀才二人金補承信郎令齋文字前來本縣亦將此二人處斬梟首號令及兩縣弓手土豪章開王仙畢康等糾率諸鄉保甲義不從降委是防托有功緣本州管下寧國縣與兩邑接境其知臨安府康允之未知去處吏民

無所申訴臣已逐急依已得聖旨便宜措置將立功四人先次借補承信郎及專遣使臣齎去年十二月二十日蠟彈手詔曉諭官吏兵民各用命守禦去訖臣竊觀金人敢深入江浙於天時地利皆非所宜臣已率勵將士及將已圖結到六縣保甲并招安到杜充防江統制官馬吉李進并班直京軍等邀其歸路臣已移文劉光世乞帶領大兵前來同衛王室及申本路轉運使李尚行朱異前來權建康府安撫司職事庶幾列郡有所稟

承並未蒙回報今敵馬既屯駐臨安府行在信息隔絕
難通小人遂無忌憚臣累具奏聞欲乞速降睿旨差委
重臣前來建康或令宣撫使周望傳檄四方約日進兵
水陸分布可使隻輪不返伏候勅旨

乞與宣州官吏推賞狀

契勘近緣金人渡江建康府廣德軍臨安府溧水建平
餘杭臨安縣等處失守本州境壤相接事勢危急自十
一月十八日以後敵騎潰兵日夕侵逼動以萬計少者亦

不下千百人所賴官吏協心將士保甲用命防守至今
凡九十餘日卒保無虞所有前後出戰把隘守城招撫
等文武將佐人吏等實有勤勞欲望聖慈令臣開具保
奏推恩庶幾有以激勸

乞令漕臣應副岳飛錢糧等狀

臣契勘本州自軍興以來偶免殘破前後過軍萬數浩
瀚皆臣竭力應副不敢毫髮仰干朝廷今來巨師古劉
晏岳飛大兵屯泊境上應副錢糧需索犒設臣不敢辭

避竊緣官軍與戚賊相持雖已出境緣建平漂水縣廣德軍諸處並無官吏人民臣不免出境應副臣見差官三員在廣德界上及岳飛軍前專切運糧委是費力其本路漕臣亦合移檄傍近州縣同共那移應副錢糧及犒設金銀等況建康府已收復了畢自合前來管幹職事望聖慈憫察本州係是小郡前後被害非一速賜行下本路漕臣應副岳飛一項人兵六月二十日奉旨岳飛
一行軍兵已降指揮聽

張俊節制所有合用錢糧自合張俊下隨軍轉運應副
仰隨軍轉運副使劉蒙疾速支撥應副不得少有闕誤

乞與土豪鮑琢補官狀

勘管下旌德縣保甲土豪鮑琢等一項僅三千人緣自方賊作過時已自結集中間保護州境雖未立顯效不曾費耗官中錢糧當州縣擾攘之時起發入城官兵寡弱亦倚以為重盜賊不入郡境前知州呂好問嘗假以承信郎及校尉等名目緣此累經朝廷陳狀希望恩賞朝廷以許置土俗器仗令防秋之際若因而撫之亦足倚仗今來不敢別干朝廷只乞依已得指揮將前知

州劉資政已給降空名劄子先次補授五七品此輩既已得官遂有顧藉防托過冬春將已結保甲盡行散遣收其器仗庶不為久遠之害

乞回避曾紓狀

朝奉郎新除徽猷閣待制知臨安府兼兩浙兩路兵馬
鈐轄臣李某奏蒙恩除前件差遣將欲到任伏見新除
本路轉運使曾紓臣頃任侍御史日曾論列本官緣此
送吏部今來正係統轄兼軍興之際財計用度動相關

決委有妨嫌伏望聖慈憫察別除臣一合入差遣或官
祠一次伏候敕旨

十月五日奉聖
旨特不回避

乞留吳錫狀

臣伏聞已降指揮楊沂中出戍淮甸及吳錫一軍亦隨
逐前去臣之愚見竊慮敵人知大軍盡屯淮西或遣舟
師由海道擣虛又徐文久在江浙熟於道路今聞往來
沿海登萊諸郡風帆浪舶日行數千里理宜關防臣愚
欲望聖慈且留吳錫一軍以備緩急狂瞽之言誠為過

慮然大駕所在理宜嚴密惟陛下留意省察幸甚謹錄
奏聞伏候敕旨

小帖子

臣之愚見竊慮楊沂中合令侯巨師古到然後啟行
伏乞聖察

又小帖子

議者謂春夏風多東南然亦時轉西北伏乞聖察



欽定四庫全書

莊簡集卷十一
集部

詳校官庶吉士臣翁樹培

侍讀臣孫球覆勘

謄錄監生臣張曾壻

謄錄監生臣范維城

欽定四庫全書

莊簡集卷十一

宋 李光 撰

奏議

辭免吏部侍郎狀

臣十月二日準尚書省劄子九月二十八日三省同奉
聖旨除臣吏部侍郎令乘遞馬疾速前來者臣聞命震
恐固知所為伏念臣稟性拙艱承學固陋幸遭旦暮之
遇得效馳驅比自宮祠更守近郡携孥到任曾未浹旬

敢謂誤恩有此除授退循謗薄彌切兢凌况天官劇曹
素號雄選吏姦而莫究其弊官冗而未知所澄非得剛
明之才曷振頽靡之習如臣庸懦豈敢冒居伏望聖慈
特賜追寢成命庶安愚分臣已於當日交割職事與以
次官一面起發迤邐至前路聽候指揮謹具狀奏聞伏
候勅旨

乞車駕親征劄子

臣聞能扶天下之危則據天下之安能除天下之憂則

享天下之樂能救天下之禍則獲天下之福故聖人不
畏多難而畏無難蓋多難之世懷戒懼怵惕之心無難
之世有宴安鴻毒之累自昔有為之君或開創基業或
撥亂中興身遭艱阨而能奮然特起者未易槩舉以漢
高之英雄身居項王掌握中數矣然城破復收兵散復
合彭城之敗至推墮二子而不顧窘亦甚矣卒能滅楚
以有天下者忍小恥以成大功也光武北徇燕薊困於
王郎蒙犯霜露面背破裂惶惑不知所之然卒能破郎

以興漢祚者因危難以恢帝業也恭惟陛下以慈儉之
德當艱阨之運維揚之變起於倉卒人心緣此而震恐
將士因是而驕惰近年以來議論之臣各懷顧避上下
一律莫肯慨然以持危扶顛為已任者今翠華駐蹕會
稽首尾三載自去秋迄今見敵人無復南渡之意淮甸
咫尺了不經營長汎千里不為限隔惴惴然日為乘桴
航海之計謂之萬全臣所未喻也以區區晉元草創建
國於基緒既絕之際猶能立宗社修宮闈興學校農桑

保有江淵劉琨祖逖與聰勒拒戰於并冀充豫梁雍諸州未嘗陷沒也以石季龍之彊大兵叩歷陽命王導都督中外諸軍事以禦之周世宗當五代之末取淮南攻隴右下三關皆御軍親行威震遠近未聞專主避敵之謀如今日也况陛下英武命世以真主之勢而臨金邦以中國之尊而抗外國天人助順軍人士庶孰肯甘心委質俯首帖耳終身為汙辱降敵之人哉今將非不武兵非不衆陛下儻整兵順動則簞食壺漿以迎王師者

袂相屬也患在陛下無其志耳臣愚欲望陛下明詔三省密院大臣分令將士守禦江津力為保境之謀徐決親征之策庶幾經畧中原漸謀興復以副海內生靈顥顥之望天下幸甚取進止

乞追罷守臣遞避詔書劄子

臣頃守宣城準樞密院劄子建炎三年六月十二日奉聖旨金人入境多是因敵就糧深入內地致使吾民重遭塗炭今逐州府守臣與當職官共議或守或避各得

自便臣仰見陛下憂憫元元開示寬大之意可謂至矣
臣竊謂守土之臣朝廷委以人民社稷之重固當存亡
以之若預開遷避之門則人心携貳亦無肯固守者矣
臣觀百姓安土重遷非謂其愚無知也亦其勢不得不
然蓋富者少而貧者多所資以生養者不過日求衣食
之奉居於山者則有樵採之利居於澤者則有網罟之
利都邑之民則盡智於交易田野之民則竭力於壠畝
皆相資以為生者今使轉而之他則是數者皆失其本

業將坐而資於官乎數萬之衆力固不足以給之如此
非獨老弱轉乎溝壑雖強且壯者固不免也朝廷設官
分職凡以為民若使列郡各得擇地遷避大者不過全
其帑藏小者不過保其妻孥而已此於百姓何所利哉
臣之區區誠願陛下申敕諸郡修城池備器械積芻粟
聚人民力為固守之計有望風逆降棄城者皆嚴立法
禁責以必死大者保境小者守城敵人雖復長驅豈能
遽窺行在如前日乎臣愚伏望陛下速降指揮追罷三

年六月詔書慨然責以大義命將帥遣戍役力為保境之謀庶幾列郡聞風有所畏憚實天下幸甚取進止

乞戒約苛斂狀

臣契勘移蹕事務不免科擾臨安府及傍近諸郡如竹木等物益有不獲已者今来不住體訪得諸邑及嚴州等處更有轉運司科派下供應班直木炭藁薦萬數浩瀚初不曾被受朝廷指揮以此道路傳播頗屬騷擾深為未便緣臣使事止是總領本府其傍近諸郡難以會

問伏望聖慈作訪聞行下嚴賜約束庶幾少革苛斂之
風仰副陛下仁儉之意不勝幸甚謹錄奏聞伏候敕旨

論移蹕措置事宜劄子

臣伏覩朝廷已降詔旨移蹕臨安府士大夫皆倒笏相
慶又聞御批令婺州所屯張俊兵亦移屯臨安府臣仰
見陛下乾綱獨斷不為衆議所奪此誠社稷之福生靈
之幸也然臣竊有愚慮大抵舉事務欲萬全若不審思
必有後悔臨安經屠戮焚掠之酷金碧之區化為瓦礫

一旦移蹕復屯大兵則官司廬舍未易遽葺茅茨土階
之陋陛下縱能安之其如當此寒沴若加以雨雪連綿
數萬之衆不免散處市井侵奪民居勢難禁約臣愚伏
望陛下遠詔三省密院大臣就卿監郎官中選差有精
力幹才者一二人專往本府同徐康國及見任官多方
措置務要不擾而辦候行宮軍壘稍成次第然後發遣
諸軍翠華順動其婺州所屯將兵家屬乞且於衢婺寄
留止發壯勇仍令本府量度人數先次搭蓋蓆屋方得

卷十一
移屯庶幾盛寒之際居者按堵免遷避之勞行者如歸無暴露之患不勝幸甚

乞裁減營繕行宮狀

臣昨準尚書省劄子奉聖旨遣臣先至臨安府節制本府人兵及總領移蹕事務臣到本府踰旬與漕臣宋輝徐康國及知臨安府席益以次僚屬協力幹辦稍見次第臣契勘行宮殿宇元奉指揮合依徐康國所上圖策以一百間為率士大夫傳誦皆仰服陛下深自貶損愛

惜民力之意臣今體訪不往承準內降御寶營造去處
非元圖所載竊慮兩漕臣及臨安應辦過當輒致木植
追呼夫匠無有已時前日所降敕榜戒約殆為虛文臣
今欲望陛下應合增修起造去處令臣預知或有過當
許臣執奏庶幾上體陛下恭儉之德下寬九邑凋瘵之
民實天下幸甚謹錄奏聞候勅旨

乞免住罷行宮營繕狀

臣近準省劄奉聖旨今防秋戒期建康府修內可罷封

椿所降錢別聽指揮臣除已恭依即日住罷外竊緣臣所造正殿寢殿兩廊殿門等處各已畢工獨別殿壅舍雙門既已立木惟給瓦未了工役已多若便住罷竊慮暴露風雨柱壞材植他日之費必倍未審合與不合遂旋搭蓋結瓦更合取自聖裁况今農事將隙自有添差

通判吳師直專領營繕與臣防秋職任自不相妨伏候

勅旨

九月十一日三省同奉聖旨依已降指揮日下住罷其已立木并見在材植並如法遮蓋不得損壞

乞罷營繕添支狀

準尚書省劄子發運副使宋輝等劄子承降下添修辦
截行宮所畫一除修內司兵近已奉十一月二十一日
聖旨許每日支破食錢一百文外所有壕寨監修部役
催促物料點檢醫藥飯食監門等官每日往來監轄工
作分頭部役委是勤勞即未有許支食錢指揮已奉聖
旨自都壕寨官日支一貫至白身尅擇官日支三百文
凡三十一員以月計之共支錢五百餘貫須至奏聞者
右臣契勘今來諸營造已見次第不出歲前可以畢工

今上項監修官已有本身請給又有券錢令又添支逐日食錢委是太優竊慮緣此妄作名目多方遷延未見了日臣愚欲望聖慈特降睿旨除軍營席屋外其行宮百司並限紹興二年正月初五日前結局更不添支食錢如此非獨大駕移蹕有期亦足少革妄濫之弊謹錄奏聞伏候勅旨

乞蠲二浙積欠劄子

臣伏見近年以來國運艱難中原板蕩陛下駐蹕東南

乘輿服御悉務減省而百司兵衆皆仰給於二浙加以
今日營繕所須一毫以上皆出民力師旅飢饉之後斗
米千錢民雖凋弊罔有怨詞深可憐憫臣愚伏望聖慈
因今移蹕之後稍留寬大之澤以慰人心應二浙積負
一切蠲除臣契勘臨安九邑科配比它郡最為煩併其
折變小麥為害尤甚及去年殘零稅賦見今轉運司責
限催納其數至微欲望特與釋放昨緣前知府孫覲將
義倉米於正稅外更有折糙米二斗五升倉場受納復

增至一石又有鈔旁公吏乞覓不下一二千及每歲和買州縣既不曾支與價錢今聞本府每匹更令納見錢四百文足謂之糜費錢竊慮行之既久遂為永例諸縣因軍馬經由支過係省錢斛多不肯豁除坊場虧欠課利委非侵欺無緣補發而官吏欲假此騷擾時一舉行追呼捕逮謂之干照錢縣官無所從出止是剥民如斯苛細望悉蠲除庶幾小民蒙被實惠仰副陛下勤恤民隱之意取進止

進裴度平蔡州故事論主斷

唐書李愬傳曰初吳秀林降元濟請罪梯而下檻送京師臣聞古之善用兵必有正有奇是也唐太宗問李靖曰曹公云竒正旁擊卿謂若何靖曰臣愚謂大衆所合為正將所自出為竒烏有先後旁擊之拘哉臣觀李愬之入蔡蹈不測之險以邀非常之功可謂用竒矣當是時吳元濟勁兵銳卒多屯洄曲宰相裴度為宣慰招討使馬總副之韓弘為都統李光顏烏重胤為大將軍賊

兵雖衆勢足以抗之憇之勝敗不係朝廷之安危也憇自文城柵襲張柴疾馳二百里夜半到蔡黎明擒元濟其摧大敵不啻反覆手之易一何神哉今議者不盡歸功於憇曰平淮蔡者裴度也不盡歸功於度曰成蔡功者憲宗也蓋憇雖出奇其實功狗耳而排衆論以主伐蔡之謀者度也度雖主謀議而獨斷不疑者憲宗也故韓愈頌曰凡此蔡功惟斷乃成嗚呼社稷之計安危之機有間不容髮者與衆智慮之一庸人足以擾之故謀

之欲廣斷之在獨斷而後行鬼神避之非人主灼見禍
福利害之源孰能成其功哉

進德宗稅間架故事論聚欽

唐建中四年初行稅間架法

臣聞之易曰何以守位曰仁何以聚人曰財理財正辭
禁民為非曰義然則善為國者安可不務理財以足用
度乎故周室之興厚生民之本則有如公劉齊威之霸
富國強兵之術則有如管仲李悝之平糴耿壽昌之常
平劉晏之平準皆能斂不及民而用度足其經理財用

必有術矣至於後世聚斂之臣益非有生財之道不過
掊克生靈割剥百姓以欺惑人主冒一旦之寵祿而已
豈真能為人主興利除害使上下給足乎今軍興之際
固宜講究利源以佐國用而自冬春及今朝廷用議者
之說巧為名目以斂民財戶帖鬻爵交引給換等法中
外騷然遠近疑惑上下愁怨臣恐邦本一搖其禍有不
可勝言者伏望聖慈深詔大臣訪求通知財用之士別
議生財之術量入為出以制國用如前世數人遺法尚

有可施行者古人有言與其有聚斂之臣寧有盜臣蓋
自古亂離社稷憂危未有甚於今日者皇天后土眷顧
陛下故十年之間強敵偽廷稍稍沮却東南年穀屢登
兵力漸振中原赤子矯首望幸庶幾復覩漢衣冠者恃
陛下德澤有以得人心也昔范祖禹論奉天之難其畧
曰德宗以饑羸之卒守一縣之地而當朱泚十萬之師
備禦俱竭危不容喘所恃者人心未去也卒能克復宗
社不失舊物而况以天下之大億兆之衆守之以道德

用之以仁義其孰能敵之故人君苟得民心則不在地之廣狹兵之衆寡王天下猶反掌也湯以七十里文王以百里豈不信哉臣每每戒陛下以不可行苛刻之政無名之賦務存省深慮此聲一出遠近傳播人心動搖也惟陛下察之

論招降盜賊劄子

臣聞之書曰火炎崐崙玉石俱焚天吏逸德烈於猛火殲厥渠魁脅從罔治太祖皇帝創業之初蓋用此道故

能混一區宇平定天下其本在乎得民心而已國家自
靖康以來因金人內逼百姓失業無所得食弱者轉徙
乎溝壑強者結集為寇盜固非有讎主嫉上之心特出
於不得已耳若撫循有道駕馭得術因其謳吟思歎之
心廣開招懷撫納之路民皆吾民土皆吾土則陛下建
立中興之功不啻若反掌之易今曹成張用李宏馬友
劉忠孔彥舟之徒各擁衆數萬跨州連邑荆土驟然比
之敵人尚可以游說動也况祖宗德澤在人陛下寬仁

得衆倘能降咫尺之詔遣一介之使布宣王靈開示德
意又以實利及之彼不為我用尚何為乎臣觀自古創
業中興之君未有不藉此屬而能得天下者漢興楚大
戰彭城不利隋何說黥布發兵背楚卒滅項王闕西號
光武為銅馬帝正以受降群賊耳魏武得黃巾三十萬
衆遂定中原今朝廷兵力寡弱議者乃謂盜賊不可保
恃持必殺之說臣所未喻也自李成破敗北走劉豫群
盜稍稍革心倘因斯時顯用一二酋豪以風厲黨類必

遞相敵豔以次歸降伏望陛下斷自聖心因孟庾韓世忠出使諭以此意勿以多殺為功而以招納為本仍乞別選漕臣一二員下荆湖之粟專切應副糧食汰其老弱以散處淮甸收其精勇以防守江津蔽遮金人興復中土是謂一舉而兩得也

乞降空名官告狀

臣契勘今來防秋選差材武兵將分守江險及措置淮西軍政事務所繫非輕比來不往有北來效順歸國及

投獻機密之人未有重賞誘慰其心欲望聖慈特降睿
旨給降空名廸功郎承信郎等官告付臣收管候接納
到效順及有奇功顯著之人量其功績書填給付訖具
名申知朝廷庶幾招懷撫納不煩干戈有以激勸

乞廢東南湖田劄子

臣契勘東南地瀕江海水易泄而多旱歷代以來皆有
陂湖蓄水以備旱歲蓋湖高於田田又高於江海水少
則泄田中水多則放入海故無水旱之歲荒蕪之田也

祥符慶歷間民始有盜陂湖為田者三司轉運使下書
切責州縣復田為湖當時條約甚嚴謹水之畜泄則有
閉縱之法禁民之侵耕則有賞罰之法近年以來所至
盡廢為田澇則水增益不已旱則無灌溉之利而湖之
田亦旱矣民既已承佃無復脫期所收租稅悉充御前
而漕司暗虧常賦數至百萬而民之失業者不可勝計
可謂兩失伏望聖慈速賜指揮盡罷東南廢湖為田者
復以為湖庶幾凋瘵之民稍復故業不勝幸甚取進止

三月一日奉聖旨今逐路轉
運司常平司同共相度奏聞

論孫覲劄子

臣伏覩紹興元年十二月十四日三省同奉聖旨備坐祖宗舊制應贓吏決杖配諸州牢城蓋謂軍興之際不免時有科率若更容縱贓吏並緣為姦則民力愈弊此有以見陛下意在生靈深疾貪汙命下之日孰不相慶今已累月而諸司按察官循習既久恬不為怪遂使朝廷美意委為空文臣竊痛憤伏自艱難以來朝廷一切姑

務涵貸凶貪之徒割剥生靈無所忌憚况朝廷行法當
自貴近始臣伏見前知臨安府孫覲在任贓汙不法遠
近播傳諸司懼其一旦復用則為已害不敢按發覲之
為人朝廷所知前後臣僚論列罪大惡稔至辱罵君父
甚於仇讎有臣子所不忍聞者陛下貸而不誅又使復
典郡寄於覲恩高厚矣乃不悛革益肆無賴到任之初
以軍期為名拘九邑縣令在府勒令出錢共四萬五千
餘緡名曰助軍不附文歷又將親信使臣毛汝能辟為

都監文林郎毛珪權錢塘縣令令二人提領本府應干倉場庫務偷盜轉易不可稽考郡中官僚相顧側目至有人生五馬貴莫受二毛侵之語臨安府捉獲酷賣私酒百姓其家富厚覲令珪受錢一千貫更不解送所司至帖下本縣直行放免又遣所親姓董人乞覓過新城縣百姓唐邦臣等錢一千伍百貫皆有跡狀除代之後將犒賞金銀錢物與都吏專知官等分受比至得替其公庫供帳之物並不發還及將空名度牒官告等移易

妄用收附不明監司往來厚加結納每到發送饋謂之
合食日事燕遊每會不下百餘千以此上下相蒙無緣
顯露伏望聖慈奮發乾剛出自睿斷送大理寺或差臺
官一員就府置司體究候賊證分明捕逮送獄依法斷
遣以警具僚其屬邑縣令及人吏等迫於威勢者賊非
入已或許其自首庶幾遠近聞風咸知畏戢實天下幸
甚取進止

畫一申請狀

某準尚書省劄子奉聖旨除江南東路安撫大使兼壽春府滁濠廬和州無為軍宣撫使合行事件並依葉夢得已得指揮施行合有申請下項

一契勘近葉夢得申請沿江一帶分屯人馬約五萬人月支錢一千五萬貫米三萬七千五百石雖承建炎四年九月二日朝旨許於本路取撥應干諸色上供經制等錢四十萬貫米二十萬石應副緣所降錢米經今年餘愈見闕少無可取撥欲望特賜指揮依例下戶部

印造臨安府榷貨務見錢關子四十五萬貫變轉軍糧
支用等

一契勘本司激賞銀絹近葉夢得申乞行給降銀絹各
五千疋兩雖承朝旨令本路漕司依數支給其本路除
合起上供外別無合取稟名若依例乞下戶部應副亦
系朝廷所管之數某近緣差赴宣州分揀韓世清軍馬
有拘收到本軍絹六千七百五十匹見在宣州椿管續
承朝旨起赴行在并前知本州李學士計置到銀一萬

八千餘兩金一百五十六兩亦在軍資庫椿管伏乞就行取撥專充激賞候支使絕別具申請支降上項畫一伏乞詳酌速賜施行

申三省樞密院乞支錢立寨屋置軍器狀

契勘今來防秋自建康府沿江一帶險隘去處並合劄立寨柵砲座備禦見已措置建康府東接鎮江府界南接太平州地分相視到合立寨共二十四處合要寨屋并安立砲座所用竹築木植數目浩瀚建康府未經殘

破以前舊是諸縣團集土豪各自建置本府昨遭兵火
殘破至甚民力凋弊倉庫匱乏無所從出目下已自秋
深事不可緩欲望朝廷詳酌速賜指揮支降見錢五萬
貫付本府起置其錢乞就便於見在本府榷貨務內支
撥所費使得使用伏候指揮

乞差文臣屯兵廬州狀

臣契勘淮西路廬濠二州及六安軍最於偽地接境近
聞王彥充復於壽春府鴉兵聚糧有窺伺之意竊慮王

亨寇容謝通輩兵力寡弱透漏過淮南則大江之外盡入賊境深為未便臣自到任累具申奏後來又乞五千人并乞差近上文臣一員前去廬州屯駐雖蒙聖慈憫察降付都督府至今未蒙施行今呂頤浩已到行朝伏乞速降指揮庶幾防秋之際不致誤事伏候敕旨

貼黃

臣契勘長江千里守禦為難若止於兩淮防托則力省功倍臣所乞文臣一員如傅崧卿難行則本司叅議官

宗頴乃宗澤之子以其父故為諸將所愛又其人亦慨然有忠憤之氣或蒙聖慈假以制置或招撫使副之名

臣一面措置乞賜速降指揮

八月六日奉聖旨令李某別選文臣一員充淮西巡撫使仍

差兵二千人付所差官

將帶前去廬州屯駐

乞差胡舜陟往淮西狀

臣近准樞密院劄子奉聖旨令臣別選文臣一員充淮西巡撫使仍差兵二千人付所差官將帶前去廬州屯駐臣令再踏遂到知江州胡舜陟歛歷內外差遣項知

廬州為一方軍民所愛兼其人忠義奮發諳曉軍政堪充任使伏望聖慈特與復元職名速降指揮施行

論火災狀

臣近權刑部職事今月二日準尚書省劄子備坐臣僚章疏論臨安府回祿之警一月之內火凡數作焚爇之家遍及千餘乞申嚴昨降指揮以凌遲處死治放火者仍乞下審院劄付沿流州軍密行捕捉等事三月十四日三省同奉聖旨依奏臣之區區竊有可疑者臣聞

堯以水為儆予湯以大旱而罪已未聞盡歸之於他人者自昔火災之變上應天道蓋熒惑徘徊斗牛之間久矣牛斗吳分也又南方之性察陛下宜思所以致火之變朝政之闕失臣下之姦邪賦役之重民不聊生流亡者多百姓失業州縣之吏或倚法而恣賊貪固圄之間或受賊而多枉濫有一於此皆足致災今議者曾不卹此方峻刑以治失火之家緣及官司舍屋皆付之極典夫姦細固所當治也而失火之家蓋有不幸者臣恐淫

刑濫罪橫及無辜非陛下遇災恐懼脩省之意兼沿流
州軍譏察細姦自有約束今乃使之各察放火之家則
是疏黃發燭千里而隨身矣臣愚伏望聖慈止行下臨
安府令督責在城兵官各認地分如有違犯重寘典憲
所有今來已得聖旨指揮臣未行出謹錄奏聞伏候勅

旨

御筆前降指
揮更不施行

乞委官節錄封事劄子

臣恭聞陛下因城內火災惕然恐懼延問近臣憂形於

色乃發德音下明詔以求直言此甚盛之舉也陛下自即位以來數遭變故倉卒之際即下求言之詔勤勤懇懇發於至誠然覩歲閏月國勢日削鄰敵日強盜賊益熾百姓益窮天地之變水旱為災星辰失度寒暑反時此豈盛德之報也哉臣意陛下有求言之名而無聽言之實故也今艱難之時憤激獻忠者當累及之臣竊慮封事之多未易省覽不免壅積是徒為文具而已臣伏見仁祖時嘗委張方平司馬光詳定中外所上封事盡

心料簡合於義理可施行者雖文采不足一一奏聞光
與方平亦嘗奏乞其間識慮稍出於衆開陳政體文理詳
明者乞賜召對面加詢訪果有可採藉其姓名隨才擢
用今中原士大夫輻輳東南所獻封事豈無公論臣愚
伏望聖慈檢會祖宗故事專委侍從官二員擇其公忠
端亮者俾之遴選據所可取者節錄成冊每季或逐月
進呈以備乙夜之覽忠言嘉謨庶有裨益以仰副陛下
恐懼修省艱難求助之意